



جَابِتْز مَفْتِي جَوْهَر

Kaedah Penentuan Aidiladha di Malaysia

1. Kaedah penentuan Aidiladha di Malaysia pada masa kini adalah berpandukan rukyah dan hisab. Sepertimana yang telah diputuskan oleh Majlis Raja-Raja Malaysia dalam mesyuaratnya kali ke-164 pada 3 Februari 1994 setelah mendengar pandangan dan syor Jawatankuasa Fatwa Majlis Kebangsaan Bagi Hal Ehwal Ugama Islam Malaysia yang bermuzakarah pada 22 Ogos 1992.

2. Antara hujah Jawatankuasa Fatwa menyetujui penentuan Aidiladha berpandukan cerapan hilal Zulhijjah sendiri dalam muzakarahnya pada 22 Ogos 1992 dan 23 April 2002 adalah firman Allah SWT mengenai rukyah hilal untuk menentukan awal bulan yang bermaksud :

“(Masa yang diwajibkan kamu berpuasa itu ialah) Bulan Ramadan yang padanya diturunkan al-Quran, menjadi petunjuk bagi sekalian manusia, dan menjadi keterangan-keterangan yang menjelaskan petunjuk, dan (menjelaskan) perbezaan antara yang benar dengan yang salah. Oleh itu, siapa di antara kamu yang menyaksikan anak bulan Ramadan (atau mengetahuinya) maka hendaklah ia berpuasa, dan siapa yang sakit atau dalam musafir, maka (bolehlah ia berbuka dan kemudian wajiblih ia berpuasa) sebanyak hari yang ditinggalkan itu pada hari-hari yang lain...”

surah al-Baqarah ayat 185

3. Juga hadith-hadith riwayat Muslim mengenai ibadah korban mesti dengan melihat hilal yang bermaksud:

“Dari Umm Salamah bahawasanya Nabi SAW bersabda; ‘Apabila kamu melihat anak bulan Zulhijjah dan ada di kalangan kamu yang mahu berkorban maka hendaklah dia (orang yang hendak melakukan korban) jangan memotong rambut dan kukunya.’”

Sahih Muslim: Nombor 3655 (Cetakan Dar Al-Amiyyah)



4. Begitu juga hadith riwayat Muslim mengenai hilal yang mempunyai matla' (kawasan yang berada pada jangkamasa waktu-waktu terbit dan terbenam yang hampir sama) tertentu yang bermaksud,

"Dari Kuraib bahawa Ummu al-Fadl telah menghantarnya menemui Muawiyah di negeri Sham. Kuraib berkata, 'Aku tiba di Sham dan menunaikan hajatnya sedangkan perisytiharan tentang kelihatan anak bulan berkumandang di udara. Aku melihat anak bulan pada malam Jumaat kemudian aku balik ke Madinah pada akhir bulan, pada masa itu aku ditanya oleh Abdullah bin Abbas yang menyebut tentang anak bulan.' Katanya, 'Bilakah kamu melihat anak bulan?' Aku menjawab, 'Kami melihat pada malam Jumaat!' Ibn Abbas bertanya lagi katanya, 'Adakah engkau sendiri melihat anak bulan itu?' Aku menjawab, 'Ya, orang lain pun melihatnya dan mereka itu berpuasa, Muawiyah turut berpuasa.' Ibn Abbas berkata, 'Kami di sini melihat anak bulan pada malam Sabtu, oleh itu kami terus berpuasa hingga kami sempurnakan 30 hari atau hingga kami melihat anak bulan Syawal.' Aku bertanya, 'Tidakkah memadai bagi kamu dengan penglihatan anak bulan itu oleh Muawiyah dan puasanya?' Ibn Abbas menjawab, 'Tidak! Beginilah caranya Rasulullah SAW menyuruh kami...'"

Sahih Muslim: Nombor 1819 (Cetakan Dar Al-Amiyyah)

5. Untuk penentuan awal Zulhijjah 1443H, kebanyakan negara di seluruh dunia telah mencerap hilal pada petang 29 Zulkaedda 1443H bersamaan 29 Jun 2022M yang lalu. Antara negara tersebut termasuklah negara Malaysia, Indonesia, Brunei dan Singapura yang lebih dikenali dengan MABIMS. Arab Saudi dan negara-negara Timur Tengah juga telah mencerap hilal Zulhijjah pada tarikh yang sama.

6. Tiada negara anggota MABIMS melaporkan telah berjaya mencerap hilal pada petang tersebut. Di Malaysia, 29 tempat cerapan rasmi keseluruhannya melaporkan tidak berhasil mencerap hilal. Justeru, Malaysia dan kesemua negara anggota MABIMS telah menetapkan 1 Zulhijjah 1443H adalah pada 1 Julai 2022M



seterusnya akan menyambut Aidiladha pada 10 Zulhijjah 1443H bersamaan 10 Julai 2022M (Ahad).

7. Arab Saudi dilaporkan telah berhasil mencerp hilal Zulhijjah di kawasan Tumair dan menetapkan 1 Zulhijjah 1443H bersamaan 30 Jun 2022M (Khamis). Bermakna tarikh wuquf di Arafah jatuh pada 9 Zulhijjah 1443H bersamaan 8 Julai 2022M (Jumaat) dan Aidiladha pada keesokkannya iaitu 10 Zulhijjah 1443H bersamaan 9 Julai 2022M (Sabtu).

8. Matla' negara Malaysia yang berbeza dengan Arab Saudi yang berkedudukan lebih barat menyebabkan peluang kenampakan hilal lebih tinggi di negara berkenaan. Perbezaan waktu antara kedua-dua negara adalah sekitar lima jam. Justeru, ketika hilal dicerap pada waktu matahari terbenam di Arab Saudi, kedudukan hilal tersebut adalah lebih tinggi berbanding di Malaysia.

9. Setiap negara hanya boleh menerima pakai keputusan cerapan hilal matla' negara masing-masing. Al-Syeikh Syamsuddin Muhammad bin al-Khatib al-Syarbini menjelaskan matan *Minhaj al-Talibin* oleh Imam al-Nawawi yang bermaksud ;

“Dan apabila dilihat hilal di sesuatu negara maka wajiblah hukum yang sama bagi negara berhampiran sebagaimana kota Baghdad dengan kota Kufah, tidak bagi negara yang berjauhan seperti negara Hijaz dengan negara Iraq”.

(Khatib al-Syirbini, *Mughni al-Muhtaj*, Jilid 1, Mukasurat 569, Cetakan Dar al-Fikr Beirut-Lubnan)

Maksud di dalam negara yang satu ialah matla' yang sama. Bagi matla' Malaysia adalah terletak di dalam matla' Asia Tenggara. Oleh itu sewajarnya penentuan tarikh Aidiladha mengikut persetujuan Majlis Mesyuarat Tidak Rasmi Menteri-Menteri Agama MABIMS.



10. Al-Syeikh Syamsuddin Muhammad bin al-Khatib al-Syarbini dalam *Mughni al-Muhtaj* menjelaskan kenyataan Imam al-Nawawi berhubung dengan berpuasa pada hari Arafah yang bermaksud :

“Dan berpuasa pada hari Arafah itu adalah pada 9 Zulhijjah bagi orang yang tidak mengerjakan haji...”

(Khatib al-Syirbini, *Mughni al-Muhtaj*, Jilid 1, Mukasurat 601, Cetakan Dar al-Fikr Beirut-Lubnan)

11. Hakikatnya, bukan semua negara di dunia dapat berpuasa pada detik yang sama. Sekiranya semua orang ingin berpuasa Arafah pada detik yang sama dengan orang-orang di Arab Saudi Jumaat ini, maka ketika orang-orang di Arab Saudi baru memulakan puasa, orang-orang Islam di Malaysia sudah lama memulakan puasa menghampiri waktu tengahari, orang-orang Islam di New Zealand sudahpun menghampiri waktu berbuka. Maka jadilah orang-orang Islam di New Zealand berpuasa Arafah jauh mendahului apa yang sedang berlaku di Arafah.

12. Ringkasnya, kaedah penentuan Aidiladha di Malaysia yang berpandukan kepada cerapan hilal Zulhijjah sendiri dan tidak terikat dengan hasil cerapan hilal Zulhijjah Arab Saudi adalah tepat. Pun begitu, negara-negara atau rakyat Malaysia yang berada sekitar Arab Saudi atau negara-negara sebelah barat Arab Saudi (atas dasar imkanur-rukyah atau peluang kenampakan hilal menjadi lebih besar sebelah barat negara yang berhasil rukyah hilal) perlu beraya bersama Arab Saudi.

13. Pelaksanaan puasa hari Arafah di Malaysia bolehlah dilaksanakan pada 9 Zulhijjah 1443H bersamaan 9 Julai 2022M (Sabtu).

Sekian, terima kasih.

Bahagian Falak,
Jabatan Mufti Johor.

